

四庫全書

史部

欽定四庫全書

史部
欽定盛京通志卷五十七至
九

少詹事^臣曹城履勘

總校官編修^臣朱鈴

欽定四庫全書

欽定盛京通志卷五十七

名宦

五

國朝

欽定四庫全書

欽定盛京通志卷五十七

名宦

五

國朝

烏庫禮姓扎庫塔滿洲鑲白旗人年十六即効力
戎行入關破流賊李自成屢著戰功順治十五年
授

盛京總管

賜鞍馬

聖祖仁皇帝康熙元年改總管為將軍仍以烏庫禮任之
是年疏陳所屬兵丁宜定更番直役之例以均勞
逸

詔如所請先是

盛京設戶禮工三部侍郎等官而兵民獄訟悉隸其
事於總管未設刑部至是烏庫禮請增設疏下廷議
始設刑部侍郎以下等員四年四月以疾卒於任

烏庫禮居官清慎時初設將軍辦理奉天旗民事
宜俱有條理旗民俱稱其名

巴海姓瓜爾佳滿洲鑲藍旗人沙爾瑚達長子也
初任佐領順治十四年授秘書院侍讀學士十六
年襲父一等男爵

世祖章皇帝諭吏部曰寧古塔係邊疆要地沙爾瑚達駐
防年久甚得人心今已病故其子巴海素著勤慎堪代
其父授為寧古塔總管十七年俄羅斯犯邊境巴海同

副都統尼哈哩等率兵至黑龍江松花江交會處
偵賊在費雅喀西境即疾趨使犬部界分布舟師
潛伏江隈賊船踵至合擊之賊敗卻棄船登岸竄
走巴海督兵追戰斬六十餘級溺水死者甚衆獲
其船及鎗礮軍器因招降費雅喀百二十餘戶叙
功加一雲騎尉康熙元年改總管為將軍仍以巴
海任之十年

聖祖詣盛京

召巴海問寧古塔及瓦爾喀瑚爾哈人民風俗

諭曰朕向聞爾賢能今益知爾矣費雅喀赫哲雖服然其性暴戾當廣布教化多方訓迪俄羅斯雖云投誠當加意防禦訓練士馬整備器械毋墮狡計爾膺邊方重任尚其黽勉以報朕知遇之恩初邊境蒙古有墨爾哲勒氏者累世輸貢至是巴海招之其長扎努喀布克托等願率衆內移巴海請安輯于寧古塔附近地設佐領四十以扎努喀布克托及諸族屬任之分

轄其衆號為新滿洲十三年冬巴海率諸佐領入

覲

頒賚有差

聖祖特賜巴海黑狐裘貂朝衣各一襲十七年

諭獎巴海暨副都統安珠瑚實心任事撫輯新滿洲戶咸

令得所各予一等輕車都尉兼一雲騎尉世職二十一

年巴海疏言巡緝採獲官兵宜分別所獲多寡定

獎賞之例

聖祖諭部曰盜採者緝獲視所獲多寡議叙甚為允當其非獲而孑身採捕他物者毋得妄拘並詳議著為令時

聖祖幸吉林旋蹕

諭巴海以吉林兵丁勞苦宜加憐憫

命除捕鷹取魚諸徭役俾勤耕種二十二年以奏報田禾
歟收分數不實經部臣議以革世職

聖祖諭曰巴海遷移新滿洲不可謂無功應仍令襲三等
輕車都尉世職惟罷其將軍任三十五年卒

賜祭葬如例巴海父子俱鎮守吉林寧古塔綏輯有方深得民心

薩布蘇姓富察滿洲鑲黃旗人順治初年由驍騎校擢協領皆在吉林康熙十六年四月

聖祖仁皇帝以長白山為本朝

肇迹發祥宜崇秩祀

勅遣內大臣覺羅武穆納侍衛費雅什塞護禮索鼎前往瞻視至吉林欲選曾往者導引弗可得寧古塔將

軍巴海令薩布蘇率兵二百攜糧三月以隨循溫
德亨河陸行七日至札倫果河復乘舟由幹穆呼
河逆流二日至佛多和河順流一日抵額音陸路
為林所阻翼日薩布蘇率兵伐木開路行三十餘
里陟山巔升樹而望又行數里登高峯望之遣人
還告武穆納等望見片片白光即長白山計相距
止百餘里矣武穆納等後一日至復開路行一日
詰朝又行雲霧塞徑恍惚有鶴鳴六七聲尋聲疾

走因得鹿蹊密林叢翳進至山麓跪誦

勅旨畢雲霧忽開有路可登半山石砌若平臺五峰環拱
南一峯稍下如門山水左流有松花江右流為大
小額音河中潭不流者周三十餘里由潭邊陟山
五十餘丈香樹紛郁黃花燦爛徧地積雪即向所
望見片片白光也薩布蘇曰此地人跡罕到不宜
久留遂叩拜而返有羣鹿自山奔墜時竚立視者
七人鹿適仆其七薩布納謂武穆蘇曰此山靈所

贈也令從者繫之以行不數十步回首瞻望已雲霧漫山矣仍由額音行十五日乃還吉林武穆納等還奏十七年擢薩布蘇寧古塔副都統二十一年將討俄羅斯遣薩布蘇往視水陸路徑是年建木城于黑龍江呼瑪爾二處調寧古塔兵一千五百名往造戰船運礮具以薩布蘇同將軍巴海統之二十二年薩布蘇與巴海奏言黑龍江呼瑪爾距雅克薩城尚遠若駐兵兩處則勢分道阻且過雅

克薩有尼布楚等城羅刹倘水陸運糧增兵救援
更難為計宜乘其積貯未備速行征剿一俟造船
畢度七月初旬能抵雅克薩即統兵直薄城下疏

入

聖祖諭曰寧古塔兵未諳行軍紀律將軍與副都統又不
能齊心巴海可留守吉林薩布蘇同寧古塔副都統瓦
禮祐領兵前往俟抵彼相度形勢奏請酌行尋允王大
臣等議額蘇哩在黑龍江呼瑪爾之間可以藏船

且有田隴舊跡宜建木城令薩布蘓瓦禮祜統兵
駐守十月以薩布蘓為黑龍江將軍十一月疏言
前自羅刹來歸之宜番鄂噶番錫圖頒三人効力
勤勞宜與新投誠之吉禮固哩鄂佛那西等酌給
官職以示鼓勵得

旨授宜番驍騎校餘授七品官其新投誠之鄂佛那西等
賜裘帽令馳驛赴薩布蘓軍前酌遣招撫二十三年二月
疏報宜番等抵羅刹界招撫二十一人以歸二十

四年五月薩布蘓等軍于雅克薩城南集戰船於城東南列紅衣礮于城北夾攻之先積柴城下為焚城狀城中大驚其頭目額哩克舍窮蹙乞降先是薩布蘓等屢奉

聖祖恩諭行軍不可多行殺戮至是與朋春等宣

上恩德額哩克舍垂涕稽顙謝引六百餘人徙去我軍毀雅克薩城捷

聞

聖祖諭議政大臣曰大兵迅速征行破四十年盤踞之羅刹於數日之間今雅克薩城雖已克取防禦決不可疎應于何地駐兵彈壓其速議具奏尋

允所議以副都統溫岱那秦駐守黑龍江薩布蘓移駐墨爾根建城防禦二十五年正月薩布蘓奏偵知羅刹復至雅克薩築城盤踞請于冰消時督修戰艦相機進剿

聖祖諭曰羅刹復築雅克薩城若不速行撲滅勢必積糧

堅守圖之不易其令薩布蘓暫停墨爾根處兵遷移家
口速修船艦統寧古塔等處兵赴勦其黑龍江城酌留
奉天兵守之八月薩布蘓奏言臣等圍雅克薩城已三
面掘壕築壘壕外置木椿鹿角分汛防禦城西對
江另設一軍于未流澌時泊船東西兩岸令堵截
尼布楚援兵至流澌時即藏船上流之港內以資
守禦九月俄羅斯察罕汗遣使上疏納款乞撤雅
克薩之圍

聖祖諭以別遣使來議地界

命薩布蘓撒圍城兵列艦結營二十八年四月俄羅斯使臣費耀多囉等至尼布楚與內大臣索額圖等定議令俄羅斯自毀雅克薩城徙其人去以吉爾巴齊河北岸為彼界立碑垂示久遠二十九年薩布蘓以前此索倫總管安珠瑚等所種官田二千餘晌分給墨爾根兵丁屯種三十一年同寧古塔將軍佟寶奏建齊齊哈爾城及白都訥木城以科爾

沁所進獻之錫伯卦勒察達瑚哩壯丁萬四千有
奇分駐二城編佐領隸上三旗並設防守尉防禦
等官先是有默爾哲勒屯長扎努喀布克托請內
附因于墨爾根編四十佐領號為新滿洲三十四
年薩布蘓奏于墨爾根兩翼各設一學設助教選
新滿洲及錫伯索倫達瑚哩每佐領下幼童一名
教習書義是為黑龍江建學之始薩布蘓為將軍
在任年久經理地方事務諳練明敏深得軍民之

心其平定羅刹及建興黑龍江學時稱其有文武
幹濟之才

沃內姓性佳滿洲正黃旗人順治三年隨端重親
王博洛征明屢立戰功授一等輕車都尉世職康
熙十二年擢

盛京將軍撫兵恤民繕治城郭並

奏設各城防禦得

旨允行沃內在任數年訓練士卒嚴整有節制十四年察

哈爾布爾尼叛

聖祖命沃內同寧古塔將軍巴海固守邊界境內晏然

安珠瑚姓瓜爾佳滿洲正黃旗人先世居蘇完父阿
喇穆任佐領順治元年隨睿親王多爾袞至山海
關擊流賊李自成力戰陣亡

恩加雲騎尉世職尋令安珠瑚襲隨征湖南山東及舟山
海賊屢立戰功康熙六年擢寧古塔副都統十年
增設吉林烏拉副都統調安珠瑚任之時安珠瑚

與寧古塔將軍巴海奏遷松花江新滿洲扎努喀
布克托等各姓戶口於所屬境內編四十佐領令
扎努喀等分轄其衆十七年

聖祖諭巴海暨安珠瑚實心任事撫輯新滿洲戶口咸令
得所下部議叙旋擢

盛京將軍十九年疏請裁金州巡檢改為金州營設
守備千總等官以招徠民戶五百餘丁選兵百分
習騎射標鎗烏鎗又請于沿邊展界二十餘里設

柵隘口移兵防守疏並下部議行二十一年

聖祖詣盛京

巡行邊地見立界處枯骨多暴露者

諭安珠瑚徧察瘞之二十二年以疾乞休安珠瑚任將軍
時繕城郭興屯田招來遠人興利除弊皆有成效
至今旗民追念其德感佩不已

張尚賢遼東人順治十一年知遼陽府事時

國初新設有司地方遼濶多招來流徙之民尚賢拊

循有道一二年中遂致殷富後陞奉天府尹凡新設州縣皆遵尚賢教令戶口日增民人樂業去官後遼人為立祠于城西歲時祀之

王國安益平人康熙二十八年任奉天府尹廉靜不擾三十七年再任晉兵部左侍郎卒入名宦先是國安撫浙省整飭漕務清理權稅革陋規建隄間具有條制杭城兵民雜處營債素為重累國安捐金代償焚券息爭浙人德之亦祠名宦

王克寬漢軍正白旗人少聰穎兼通滿漢文字

國初授尚陽堡四品官凡以罪徙者皆隸焉克寬除
科派濟貧苦一時流移之人咸得其所及奉天建
郡縣流徙俱赦為民克寬改授佐領尤善其職常
命子國卿建養生堂安置孤貧施粥及棺木及僱
乳嫗育嬰孩凡受生全之惠者不可殫述

徐廷璽漢軍正白旗人康熙三十四年任奉天府
丞次年擢任府尹有幹濟才抑奸暴扶善良振興

禮讓旗民大和至今稱良吏者猶不忘徐府尹云
呂履恒河南新安人進士康熙五十年任奉天府
府丞奉天兩府科歲考例以府丞代其事履恒簡
拔寒素接引後學考道論文無倦意一時士子鼓
舞奮興文風大振刻有留都文萃內多觀風月課
賞識之作至今傳誦不衰

梁世勲陝西三原人康熙時為奉天治中時有防
禦兵借住民房之議世勲視屋大小均給之又編

為保伍調置有法民賴以安

范時崇漢軍鑲黃旗人忠貞公承謨子也康熙二十三年任遼陽州知州寬簡愛民凡徵收錢糧並無火耗時議撥民屯田民多遷徙時崇以本境地屯種有餘請不他徙以故遼陽州民得安生業後陞浙閩總督有惠政閩人思之從祀道山忠貞公祠又劉貞胡祚遠陳學海先後任遼陽俱有德政百姓奉牌祀本州城隍廟

劉文亮漢軍鑲黃旗人順治十五年襲父承義佐領仍駐錦州招民十八年設府州縣康熙元年以孔允檜知錦縣事邑人以文亮父子久蒞茲土並有惠澤不忍他屬凡訟獄者猶奔控于文亮曰非劉青天不能決府尹徐繼煒以

聞奉

旨以文亮帶佐領銜兼知錦縣而調孔允檜于開原文亮蒞任招民入籍為之度邑居給牛種課勤惰而勸

相之縣境多旗莊侵占地文亮正其畛界為民立
印冊預杜侵奪故無兼併之患又設義學延師以
教文風自此始振有上駟院總管因緝逃盜妄繫
邊民數百人關文亮聞之兼程追及之於永平與
爭是非繫者乃歸至今父老猶能道其事

欽定盛京通志卷五十七

欽定四庫全書

欽定盛京通志卷五十八

歷朝人物

一

漢

晉

前燕

附

北魏

北齊

北周

隋

唐

欽定盛京通志

歷朝人物

臣等謹按遼為古營州域風厚土博長白巫閭之雄秀三江二遼之浩瀚磅礴鬱積間氣鍾靈士生其間英偉魁碩維嶽降神生甫及申有由然也兩漢六朝紀載簡略傳不數人洎乎遼金創業佐命之材屏藩之彥接踵繼起山川靈秀應運而興宣偶然歟

臣

等博考史傳徵信採輯

謹志歷朝人物第二十三

欽定四庫全書

欽定盛京通志卷五十八

歷朝人物

漢

王閔樂浪詔邯人七世祖仲自琅邪遷至東漢初
為郡三老更始敗土人王調殺郡守劉憲自稱大
將軍樂浪太守建武六年光武遣太守王遵將兵
擊之至遼東閔與郡曹吏楊邑等共殺調迎遵皆

封為侯閔獨讓爵帝奇而徵之道病卒

王景字仲通閔之子少學易遂闢衆書又好天文
術數顯宗時有薦景能理水者詔與將作謁者王
吳共修浚儀渠乃不復為害永平十二年議修汴
渠引景問理水形便景陳其利害應對敏給帝賜
景山海經河渠書禹貢圖發卒數十萬遣景與王
吳治渠隄起滎陽至千乘海口千餘里景度地勢
鑿山截澗防遏衝要疏決壅積十里立一水門令

更相迴注無復潰漏之患隄成遷御史建初八年
遷廬江太守先是百姓不知牛耕郡界有楚孫叔
敖所起芍陂稻田景至乃驅率吏民修起蕪廢教
用犁牛由是墾闢倍多境內豐給又訓令蠶織為
作法制初景以六經所載皆有卜筮而衆書錯糅
吉凶相反乃叅紀衆家數術文書冢宅禁忌堪輿
日相之屬適於用事者集於大衍元基云

李久遼東人安帝時海賊張伯路寇東萊為青州

刺史法雄所破逃還遼東久率鄉勇等共斬之遼
地以寧

晉

李胤字宣伯遼東襄平人父信早喪胤甫有知識
即以喪禮自居又以祖敏浮海不知所終設木主
事之舉孝廉叅北軍事遷樂平侯相政尚清簡入
為吏部郎銓綜廉平賜爵關中侯遷御史中丞恭
恪直繩百官憚之泰始初拜尚書轉太子少傅拜

侍中加特進俄遷尚書令亂雖歷職內外兒病貧
無以市藥帝聞賜錢十萬詔拜司徒簡亮持重稱
為任職卒諡曰成孫志嗣爵

前燕

附

高詡遼東人善天文有權畧永嘉之亂避地隱居
建武初慕容廆收攬豪傑詡杖策見之曰霸王之
資非義不濟今晉室雖微人心猶附宜遣使江東
示有所尊廆即遣長史王濟浮海詣建康勸進後

庖承制以詡為郎中令及鮑嗣進詡元覽太守鮑
破慕容仁復遼東欲盡坑其民詡諫止之鮑又謀
伐宇文逸豆歸詡曰必克但不利於將及進戰克
之詡中流矢卒

張統遼東人以樂浪帶方二城與高句驪主乙弗
利相拒連年不解樂浪王遵說統歸庖庖為之置
樂浪郡以統為太守遵叅軍事後高句驪將如奴
子據河城寇掠遼東統掩擊擒之

韓壽遼東人太興二年慕容廆進據棘城宇文大
人悲獨官率兵十萬逼城廆使召其子翰於徒河
翰請於廆曰彼衆我寡易以計勝今城中之衆足
以禦寇請為奇兵於外伺其間而擊之內外俱奮
破之必矣若合兵為一使彼得專意攻城非策之
得且示衆以怯恐士氣不戰自沮廆猶疑心壽進
言曰悲獨官有憑陵之志將驕卒惰軍不堅固若
奇兵猝起倚其無備必破之策也乃聽翰留徒河

翰果出奇兵破悉獨官盡俘其衆

北魏

安同遼東人其先祖曰世高漢時以安息王侍子
入洛歷魏至晉避亂遼東遂家焉同性端莊明惠
好長者之言登國初魏太祖徵兵於慕容垂同奉
使稱旨從征姚平於柴壁進計截汾曲為南北浮
橋乘西岸募圍姚興至遂不能救以功封北新侯
明元即位命同持節循察并定二州宣詔撫慰問

其疾苦糾舉守宰不法郡國肅然及太武監國以
同與長孫嵩奚斤崔宏等八人共聽政同在官明
察長於校練家法脩整為世所稱卒贈高陽王謚
恭惠

安難同之子幼有巧思初從杜超南伐以功為清
河太守世祖時諸將頻征和龍皆以難為長史鑿
山堙谷省力兼功遷給事中復以軍功賜爵清河
子

安原同之子雅性矜嚴沈勇多智明元時鎮撫雲
中寬和愛下甚得衆心蠕蠕犯塞輒摧破之賜爵
武原侯太武即位拜駕部尚書進爵河間公

安頡原之子辨慧多策略最有父風太祖初為內
侍長令察舉百僚糾刺無所避宜城王奚斤追夏
主赫連昌至安定馬疫糧乏為所敗頡時為監軍
欲決死戰斤言馬少欲待救騎頡曰兵疲力屈士
有飢色不一決戰則死在旦夕何救之可待等死

當戰死寧可坐受囚乎斤猶不從頡與尉春等謀
選騎待之昌來攻壘頡出力戰擒昌送京師賜爵
西平公攻宋拔洛陽潰虎牢招降萬餘戶頡為將
善綏士衆及卒降者無不歎惜神廡四年贈王爵
謚曰襄

屈恒字長生昌黎徒河人沈粹有局量太宗時以
破平涼功賜爵濟北公恭宗在東宮恒領太子少
傅內外稱平世祖委以太政車駕出征常居中留

鎮與盧魯元俱賜甲第卒贈征西大將軍謚曰成
盧魯元昌黎徒河人寬和有雅度明元時以忠謹
給侍東宮太宗親愛之及即位以為中書侍郎魯
元益謹肅內外臣工莫不敬憚性多容納與人交
掩惡揚美公卿咸親附之太祖征赫連昌親追擊
入其城門魯元隨以出入有保護功遷太保錄尚
書事賜第於宮門南卒贈襄城王謚曰孝

高道悅字文欣遼東新昌人初為諫議大夫正色

當官不憚強禦孝文時詔嘉其蹇諤以為主爵下
大夫太和間車駕將由水路幸鄴已詔都水回營構材以
造舟楫道悅表諫以為闕居宇之功作游嬉之用
損耗殊倍又深薄之危古今共慎於是車駕遂從
陸路行道悅在官儼然難犯宮官上下咸畏憚之
卒贈散騎常侍謚曰貞侯長子顯族拜給事中亦
以忠厚見稱

李元護遼東襄平人晉司徒胤八世孫少有武功

軀幹雄偉鬚長二尺以魏平齊後隨父懷慶南奔
為裴叔業司馬叔業歸魏元護贊成之景明初為
齊州刺史封廣饒伯州內飢儉表請賑貸蠲其賦
役

高宗字積善父潛自高麗歸魏賜爵陽關男居遼
東崇少聰敏以端謹稱景明中襲父爵除洛陽令
為政清斷發摘不避強禦吏民畏其威風縣內肅
然嘗謂人曰孔門四科德行爲首人能立身約已

不忘典訓斯亦足矣卒贈滄州刺史謚曰成

謹案陽關

男北史作開陽男

高謙之字道讓崇之子少事後母以孝聞及長專意經史天文圖緯之書多所該涉襲父爵孝昌初行河陰令先是有人囊盛瓦礫指作錢物詐市人馬者逸去謙之偽枷一囚于市宣言是前詐馬賊今欲刑之遣腹心密察市中私議有二人相見訢然曰無復憂矣遂執之悉獲其黨尋正河陰令捐

益治體多為故事時佞幸寵要皆嫉謙之除國子
博士與袁翻常景鄺道元溫子昇等咸申款舊好
施贍卹言諾無虧以父舅氏沮渠蒙遜曾據涼土
國書漏缺乃修涼書十卷行於世後為李神軌所
讒賜死永安中贈營州刺史謚曰康

高恭之字道穆崇之子少聰敏學涉經史所交皆
名俊幼孤事兄如父母正光中為御史糾摘不避
權豪孝莊即位除太尉長史加前將軍及元顥逼

虎牢或勸孝莊赴關西恭之曰關中荒殘何可往
請車駕北度循河東下號詔諸軍一向虎牢一赴
河內為犄角勢孝莊然之夜至河內令恭之作詔
書布告遠近於是四方知乘輿所在孝莊復辟除
御史中尉仍兼黃門恭之外執直繩內叅機密凡
益國利人之事必以奏聞諫爭無所顧憚改鑄錢
貨編次圖典選用御史皆當世名流人服其有知
人之鑒後為爾朱世隆所害太昌中贈雍州刺史

高子儒字孝禮崇之孫元顥入洛孝莊北巡子儒
踰河至行宮備陳元顥敗在旦夕孝莊以為大慰
已意授秘書郎進司徒中兵叅軍襲爵興和中四
方多有流民子儒為梁州北豫西兗三州檢戶使
安集甚衆

竇瑗字世珍遼西遼陽人系出扶風平陵漢大將
軍武曾孫宗為遼西太守遂家焉瑗仕魏為太常
博士從爾朱榮東平葛榮封容城伯乞以封讓兄

叔珍宣武時為廷尉卿及釋奠開講與溫子昇魏
季景李業興並為摘句天平中除廣宗太守有清
白稱轉中山太守為吏民所懷累遷至大中正兼
廷尉卿貧窘如布衣齊獻武王頒書州郡嘗稱援
政績以為勸勵卒謚曰明

北齊

可朱渾元字通元遼東人寬仁有武畧少與齊神
武相知後從爾朱天光平万俟醜奴等有功為守

文泰所疑遂歸神武累功拜司空封扶風郡王元
平生用兵持重未嘗負敗皇建初配享文襄廟廷
弟天元亦有將畧便弓馬封昌陽縣伯天保初位
位尚書卒謚恭武

按可朱渾元舊志以為不應濫入人物但北齊書既有
列傳且稱元自云遼東人應存之以備考

北周

豆盧寧字永安徒河人驍果善射魏永安中從爾

朱天光破万俟醜奴賜爵靈壽男周文時來歸從擒竇泰破稽胡與東魏戰于芒山皆有功進范陽郡公周保定四年卒初寧無子養弟永恩子勣及生子讚親屬皆請讚為嗣寧曰兄弟之子猶子也終不易時以此多之

李弼字景和遼東襄平人六世祖根

北史作振

任慕容

垂為黃門侍郎祖貴醜平州刺史父永大中大夫弼少有大志膂力過人屬魏室喪亂嘗云大丈夫

會須平寇難安社稷以取功名安能藉階資求榮
位乎魏永安元年從爾朱天光討破赤水蜀以功
封石門縣伯又與賀拔岳討万俟醜奴万俟道洛
王慶雲皆破之弼恒先鋒陷陣賊咸畏之曰莫當
李將軍天光赴洛弼因隸侯莫陳悅太昌初除南
秦州刺史隨悅征討屢捷及悅害賀拔岳周太祖
宇文泰討悅弼勒所部歸泰仍令弼以本官鎮原
州太統中從平竇泰又從平弘農與齊神武戰於

於沙苑以功拜特進十四年討北稽胡平之遷太保加柱國大將軍孝閔踐祚封趙國公弼每征討朝受命夕便引路畧不問私事秉性沈雄有深識故能以功名終卒年六十四謚曰武配食太祖廟廷

謹案李弼系本隴西周太祖時來歸始家遼東並賜姓徒何考李延壽北史尚載弼為隴西成紀人蓋就其始而言之今依周書所載列入遼

東人物

李擣字雲傑

北史作靈傑

弼之弟長不盈五尺性果決

有膽氣為周文帝帳內都督從復弘農破沙苑擣

跨馬運矛衝堅陷陣敵人見之皆避周文初亦聞

擣驍悍至是方嗟歎之謂曰但使膽決如此何須

八尺之軀也武成初從豆盧寧征稽胡有功封汝

南郡公

李綸弼之子有文武才以功臣子居顯職歷吏部

內史下大夫並獲當官之譽位至司會中大夫封
河陽郡公

隋

李衍字拔豆遼東襄平人父弼為周太師衍少專
武藝慷慨有志畧仕隋為行軍總管討叛蠻平之
進柱國後以伐陳功拜安州總管頗有惠政

豆盧勣字定東寧之子聰悟有器局初周明帝時
嗣寧爵授左武伯中大夫自以經業未通請解職

遊露門學帝嘉之勅以本官就學嗣丁父艱武帝
嗣位起復為渭州刺史甚有惠政大致祥瑞鳥鼠
山絕壁千尋由來乏水勸馬足所踐忽踊飛泉又
有白鳥乳子庭前人為之謠曰我有丹陽山出玉
漿濟我人夷神鳥來翔因號其泉曰玉漿泉隋開
皇中拜夏州總管上以家世貴盛勲效克彰甚重
之

李寬弼之孫幹畧過人自周及隋數任將領位柱

國蒲山郡公號為名將

度地稽粟末人本白山渠帥煬帝時窘于高麗因率所部降拜右光祿大夫居柳城及征遼東之後從戰有功十三年從幸江都尋放還柳城為李密所邀前後十餘戰僅得免

謹案度地稽唐書作突地稽

唐

李謹行靺鞨人父突地稽初事隋及唐武德初奉朝貢授總管以戰功封耆國公貞觀初進右衛將

軍賜姓李謹行偉容貌勇冠軍中累遷營州都督
高宗時破高麗于發盧河之西妻劉氏亦以伐匈
奴功封燕國夫人上元元年發兵討新羅以謹行
為安東鎮撫大使三戰皆捷新羅乃入貢謝罪三
年破土蕃於青海封燕國公卒贈幽州都督陪葬
乾陵

李楷洛營州柳城人本契丹渠師中宗時累官左
羽林大將軍封薊郡公吐蕃寇河源楷洛擊走之

初行謂人曰賊平吾不歸矣師還卒於道謚忠烈
李多祚其先靺鞨人號黃頭都督入中國多祚乃
其後裔累軍功遷右鷹揚大將軍室韋及孫萬榮
之叛命多祚進討以勞改右羽林大將軍領北門
衛兵張柬之將誅二張以多祚素感慨可動以義
就與定謀多祚泣數行下引天地以自誓遂與王
同皎李湛等共誅易之昌宗中宗復位封多祚遼
陽郡王

李惠登營州柳城人為平盧軍裨將安祿山叛從
董秦泛海畧定滄棣等州輕兵遠鬪賊不支戰輒
北史思明叛惠登陷賊中以計得脫依來瑱及李
希烈反以兵二千使屯隋州惠登挈州歸朝即拜
隋州刺史居二十年興利去害田闢戶增人歌舞
之節度使于頔上其績詔加御史大夫

李光弼營州柳城人楷洛子襲父封以功破吐蕃
吐谷渾進雲麾將軍安祿山叛郭子儀薦其能詔

加魏郡太守河北採訪使光弼以朔方兵五千東
救常山降賊將安思義又却賊於饒陽會郭子儀
守雲中詔悉衆出井陘與光弼合擊史思明于九
門西大敗之及拔趙郡士多擄掠光弼坐譙門收
所獲還之民至德二載思明等將兵十萬攻光弼
於太原時麾下兵不滿萬光弼撤屋為鼎石車石
所擊輒傷賊思明為飛樓障以木幔築土山臨城
光弼遣人穴地頽之又時遣突騎出乘賊俘斬萬

計思明乃遁去乾元初九節度師潰于相州光弼
整衆還太原未幾為天下兵馬副元帥賊方闢洛
光弼悉軍趨河陽擒安太清于懷州廣德元年擒
浙東賊袁晁賜鐵券圖形凌烟閣光弼知兵善用
人謀定後戰能以少覆衆初與郭子儀齊名而戰
功推中興第一卒贈太保謚武穆

李彙光弼子有志操廉潔自矢元和初徐州符離
分為宿州以光弼有遺愛擢彙為刺史後遷涇原

節度使罷軍中雜徭出俸錢贖將士質賣子還其
家卒贈工部尚書

王思禮高麗人入居營州初事哥舒翰以功授右
衛將軍安祿山叛思禮勸翰表誅楊國忠翰不從
潼關失守思禮走行在及收東京戰數有功封霍
國公乾元初討安慶緒九節度之師潰于相州惟
思禮與李光弼全軍還光弼徙河陽代為河東節
度副大使在鎮器甲完整儲粟至百萬斛奏輸其

半於京師卒謚武烈

侯希逸營州人天寶末為州裨將安祿山叛以其親將為平盧節度使希逸率兵與安東都護王元志斬之數擊賊有功以孤軍無援浮海保青州寶應初平史朝義加檢校工部尚書圖形凌烟閣

李澄遼東襄平人隋蒲山公寬之裔德宗時為滑州刺史李希烈陷汴滑州亦降興元初澄自永平遣盧融間道奉使詣行在德宗嘉之署帛詔納蠟

九授澄刑部尚書汴滑節度使澄密勒訓士馬以
誅希烈養子之戍白馬者及希烈悉衆圍陳州澄
遂引兵歸國貞元初遷檢校尚書左僕射義成軍
節度使封隴西王卒贈司空

李瓘渤海靺鞨人本姓茹父懷光為朔方將以功
賜姓李建中四年朱泚圍奉天懷光入援倍道至
河東敗泚兵於醴泉又敗之于魯店泚解圍去功
高威重為盧杞所忌屯咸陽不進瓘時為監察御

史密言于德宗曰臣父必負陛下願早為備德宗
驚曰然則卿以何策自免曰臣之進言非苟求生
臣父敗則臣與俱死矣使臣賣父求生陛下亦安
用之及懷光死瓘亦自殺

欽定盛京通志卷五十八

欽定四庫全書

欽定盛京通志卷五十九

歷朝人物二

遼

欽定四庫全書

欽定盛京通志卷五十九

歷朝人物二

遼

耶律赫魯字洪隱德呼勒部人其地在松漠之間
髻髻與太祖游從父舒魯奇之曰興吾家者必二
兒也其父嘗謂太祖曰爾神略天授吾兒赫魯他
日可委以事後太祖亦知赫魯賢軍國事非赫魯

議不行會討永安烏爾古部為前鋒戰有功並說
降奚部擊降室韋及太祖即位以赫嚕總軍國事
時兵民日以抗敵赫嚕撫輯有方畜牧盛滋民用
富庶太祖受尊號以赫嚕為阿勒坦裕悅從伐西
南諸部所向皆有戰功及卒立石紀功清寧間命
立祠上京太祖二十一功臣各有所擬以赫嚕為
心史臣以為君臣相得之誠庶吳漢之於光武云

國語赫嚕車輻也原作曷嚕索論語德時勒臉也
原作迭刺舒嚕解見名宦卷二原作釋魯永安國

語解見吉林山川卷原作趙兀蒙古語烏爾古孛
息也原作烏古阿勒坦蒙古解見吉林山川卷原

作爲魯敦裕悅原
作于趙今俱譯改

耶律實訥齊字薩喇六院部人太祖即位掌腹心

部撫輯西域討平渤海扶餘皆有勞績破輝罕城

大誣謬之衆威望大著天顯中卒年七十為佐命

功臣之一

蒙古語實訥齊山崗行走人也原作斜
涅赤薩喇國語解見吉林山川卷原作

撒剌輝罕解見名宦卷

二原作忽汗今俱譯改

耶律碩格字默赫特橫帳族人幼為太祖所養及

冠從伐渤海有功天顯七年授三河烏爾古部都
詳袞平易近民民安之以故久于其任會同間從
征石晉與趙延壽據中渡橋降杜重威遂定汴京

國語碩格銀錄也原作朔古默赫特上唇短也原
作彌骨頂詳袞解見名宦卷二原作詳穩今俱譯
改

高模翰一名松渤海人有膂力善騎射好談兵太
祖平渤海模翰避地高麗後亡歸下獄太祖知其
才賞之唐師五十萬攻太原石敬瑭求救太宗遣

模翰與唐師戰敗之太原圍解太宗嘗諭模翰曰
朕自起兵百餘戰卿功第一雖古名將無以過乃
授上將軍會同元年冊禮告成宴百官太宗指模
翰曰此國之勇將朕統一天下斯人之力也及石
晉背盟模翰為統軍副使下闕南城邑數十與趙
延壽議救楊覃于乾寧軍俄有光自模翰目中出
縈繞旗矛燄燄如流星模翰曰此天贊之祥遂進
兵屢勝之以功加侍中降杜重威兵三十萬車駕

入汴加特進檢校太師封開國公遷鎮中京天祿
二年加開府儀同三司賜對衣鞍勒名馬應歷初
召為中臺省右相至東京父老歡迎曰公起戎行
致身富貴為鄉里榮相如買臣輩不足過也九年
遷左相卒

耶律烏哲字達年橫帳族人姿簡靜有器識重然
諾遇事造次處之從容博學知天文會同間為
特哩衮太宗崩諸大臣立世宗太后怒甚遣皇子

魯呼以兵逆擊烏哲從中和解之乃罷兵天祿三年表列察克陰謀事世宗不聽遂為所弑烏哲率諸將討誅之穆宗即位謂烏哲曰朕之性命實出卿手命知國事後以援太原功加裕悅卒道宗時

詔上京立祠樹碑以紀其功

蒙古語烏哲看也原作屋質國語達年遮

蔽處也原作敵輦特哩袞解見名宦卷二原作惕隱魯呼撒子箭也原作李胡察克解見名宦卷二

原作察割

今俱譯改

耶律吼字赫魯六院部人端慤好施不事生產太

宗特加倚任會同六年為南院大王莅事精簡人不敢以年少易之時石晉表不稱臣詞多倨慢吼力贊伐之以所部兵從車駕入汴諸將多取珍異吼獨取馬鎧及太宗崩于藥城吼與耶律幹議曰天位不可一日曠欲厭人望當立永康王幹然之會耶律安圖意亦合遂定策立世宗以功加採訪使賜以寶貨辭曰臣位已高復敢求富臣從弟達魯諸子坐事籍沒陛下哀而出之受賜多矣世宗

曰吼舍重賞以族人為請其賢遠甚許之時有取

當世名賢作七賢傳者吼與其一天祿三年卒

謹考

遼史贊曰太宗崩非安圖吼幹謀而能斷冊立世宗非烏哲直而能諫杜太后之私折魯呼之暴以成橫渡之約則亂將誰定四臣者庶幾春秋首止之功今按安圖吼幹烏哲四人皆耶律氏安圖詳見孝義赫魯解見前原作喝魯國語幹氣味也原作洼達魯解見名宦卷原作的球安圖解見吉林城池卷原作安搏今俱譯改

耶律幹字達年南院族人少有器識人以公輔期之太祖時即任以事太宗即位為特哩衮天顯末

帝援河東韓為先鋒敗張敬達軍於太原北會同
中遷北院大王及伐晉復為先鋒與梁漢璋戰於
瀛州敗之太宗崩於欒城南方州郡携貳士馬困
乏軍中不知所為韓與耶律吼定策立世宗乃令
諸將曰永康王人皇之嫡長天人所屬當立有不
從者以軍法從事諸將皆曰諾世宗即位拜裕悅

韓原作洼達年原作敵輦特哩袞
原作惕隱裕悅作于越見前注

耶律特烈字尼嚕古六院部人沈厚多智有任重

才年四十未仕應歷初為南院大王均賦役勸耕
稼部人化之戶口豐殖及周侵漢下太原數城以
為行軍都統率精騎敗周將郭從義等於忻口保
寧元年加兼政事令乾亨初召之上見鬚髮皓然
精力猶健問以政事厚禮之嗣卒特烈用兵賞罰
明信得士卒心在治所久年穀屢稔時耶律烏哲
居北院特烈居南院俱有政迹朝議以為富民大

王云

國語特烈蒸也原作撻烈蒙古語尼
嚕古腰也原作涅魯袞今俱譚改

耶律道隱東丹王倍次子倍在唐為唐明宗所害
洛陽僧匿而養之因名道隱太宗滅唐還京詔賜
外羅山居焉性沈靜有文武才時人稱之景宗時
封蜀王為上京留守乾亨元年遷守南京號令嚴
肅民獲安業統和初卒追封晉王

耶律賢適字阿克展嗜學有大志滑稽玩世人莫
能知惟烏哲器重之嘗謂人曰是人當國天下幸
甚景宗立以功加檢校太保保寧二年拜北院樞密

使兼侍中遷西北路兵馬都部署賢適忠介膚敏
推誠待人雖燕息不忘政務以故百司首職罔敢
媮惰累年滯獄悉剖決之乾亨初封西平郡王卒

年五十三

國語阿克展雷也原作阿古真今譯改

耶律阿穆爾字布琳約尼九帳族人幼聰敏統和
初以征高麗功遷北宣徽使加政事令而先是叛
逆之家兄弟不知情者亦連坐阿穆爾諫曰兄弟
雖曰同胞賦性各異一行逆謀雖不與知輒坐以

法是刑及無罪也自今雖同居兄弟不知情者免

連坐太后嘉納著為令致仕卒

蒙古語阿穆爾安也原作阿沒里布

琳金也原作蒲隣約尼八旗姓原作遥輦今俱譯改

蕭朴字延寧國舅族人幼而老成及長博學多智

開泰中任南面林牙帝問以政具陳百姓疾苦國

用豐耗帝悅曰吾得人矣擢左伊勒希巴太平中

加中書令及大延琳叛詔安撫東京便宜從事興

宗即位仁德皇后以馮嘉努所誣被害朴屢言其

冤不報每念至此為之嘔血重熙初拜東京留守

卒贈齊王

按伊勒希巴係叅知政事掌刑政國語伊勒希副也巴地方也原作夷离畢焉

嘉努原作馮家奴今俱譯改

耶律休格字遜寧少有公輔器乾亨初將兵救南

京與宋戰於高梁河及瓦橋關皆有功帝賜御馬

金盂勞之曰爾勇過於名若人人如卿何憂不克

聖宗即位太后稱制令休格總南面軍務便宜從

事休格均戍兵立更休法勸農桑脩武備省賦役

恤孤寡戒戍兵無犯宋境雖馬牛逸于北者悉還之遠近向化邊鄙以安休格智略宏遠料敵如神每戰勝讓功諸將故士卒樂為之用身經百戰未

嘗殺一無辜及卒詔立祠南京

休格原作休哥今譯改

耶律色珍字韓隱性明敏不事生產保寧初蕭思溫薦色珍有經國才上曰朕知之第佚蕩豈可羈屈對曰外雖佚蕩中未可量乃召問時政奏對愷切高梁之戰色珍與休格最有功統和初敗宋將

潘美等于飛狐口取蔚州又擒楊無敵于狼牙村

以功加太保卒于軍給奠具

國語色珍車也原
作斜軫今譯改

耶律學古字伊實音穎悟好學工譯觀及詩乾亨

元年宋既下河東乘勝侵燕學古受詔往援有全

城功旋以高梁之捷授保靜軍節度使二年進彰

國軍節度使時南境未靜民思休息學古禁寇掠

以安之與宋將潘美各守邊約無相侵軼民獲安

業

伊實音唐古特語伊實智慧也
音是也原作乙辛隱今譯改

耶律哈里字留隱性儉素不喜聲利以射獵自娛
雖閒居人敬之若貴官然保寧中為南院大王有
却敵功帝屢親征哈里在南院十餘年鎮以寬靜
戶口增給封漆水郡王遷上京留守卒家貧詔給

葬具

哈里解見名宦表
原作海里今譯改

耶律托色字勝隱善射工畫保寧間奉使于漢具
言兩國通好長久之計其主繼元深加禮重統和
四年宋將楊繼業陷山西城邑托色從耶律色珍

擊之敗賀令圖于定安色珍擒繼業托色功居多

初托色破令圖宋將有因傷而仆者托色繪其狀

以示宋人咸嗟神妙

國語托色權也原作題子今譯改

耶律和卓字諾木滾幼不好弄臨事明敏初以近

族入侍從征有功保寧初以宋師屢梗南邊拜西

南兵馬都監招安巡檢等使久任邊防不妄啟釁

鄰壤敬畏屬部又安宋數遣人結歡和卓表聞遂

許議和安邊懷敵多有力焉鎮范陽時嘗領數騎

徑詣雄州北門與郡將立馬陳兩國利害及周師
侵邊本末辭氣慷慨自是邊境數年無事識者謂

和卓一言賢于數十萬兵

國語和卓美好也原作
合住諾木袞蒙古語諾

木經也深深也原

作拈袞今俱譯改

耶律哈爾吉字特們重熙中累遷西南面招討都

監清寧初為懷化軍節度使七年入為北院大王

封幽國公厯遼興軍節度使東北路詳袞加兼侍

中致仕卒為人明達勤恪懷柔有道置諸賓館及

西邊營田皆自哈爾吉發之

國語哈爾吉湍水也原作合里只特們國

語解見黑龍江山川卷

原作特滿今俱譯改

耶律博迪字薩巴孤介寡合重熙初補牌印郎君

清寧初稍遷知易州去官部民請留許之咸雍時

改彰國軍節度使上出獵博迪謁行宮陳應州南

境邊事稱旨太康中封吳國公為北院樞密使廉

謹奉公知無不為大安中致仕

蒙古語博迪苦提也原作頗的薩巴

器皿也原作撒版今俱譯改

夏行美渤海人太平間總渤海軍于保州大延琳使人說與俱叛行美執之復殺其黨延琳謀沮嬰城自守數月而破超遷行美平章事忠順軍節度使累遷至副部署致仕卒賜祭于家

耶律資忠字烏延博學工詞章年四十未仕聖宗知其賢召補宿衛數問以古今治亂資忠對無隱開泰初授中丞眷遇日隆四年因使高麗被留資忠每懷君親輒有著述九年高麗上表謝罪遣資

忠還上郊迎同載以歸留禁中數日謂曰朕將屈卿為樞密何如資忠不敢奉詔乃以為林牙知特

哩衮事以不附權貴出為節度使

烏廷原作沃
衍今譯改

耶律揚珠字布爾錦篤學廉介有經世志統和十年累遷積慶宮使聖宗諭曰聞卿正直是以進用國

有利害爾言毋隱時有獻替多見採納及征高麗

破康肇軍於銅州揚珠之力居多擢拜四蕃部詳

衮戢暴懷善政績顯著

蒙古語揚珠儀表也原作
瑤質國語布爾錦鞍韉也

原作扶里董
今俱譯改

大康又渤海人開泰間累官南府宰相出知黃龍
府政善撫綏東郡懷服

耶律哈瑠字速寧有明識篤行義舉趾嚴重工為
詩開泰三年稍遷烏爾古德呼勒部都監俄知詳
衮事德呼勒部叛從耶律世良討平之重熙元年
累遷同知上京留守以性不苟合為樞密使蕭嘉
哩所忌四年始召為北面林牙進述懷詩興宗嘉

嘆尋卒

蒙古語哈瑠水獺也原作韓瑠烏爾古德
時勒俱見前原作烏古敵烈國語嘉哩今

其巡察也原作

解里今俱譯改

耶律仁先字紉鄰魁偉秀爽有智略重熙十八年

任東京留守女直恃險侵掠仁先乞開山通道以

控制之邊民安業清寧中拜南院樞密使重元叛

犯灤河惟宮仁先輟車為營折行馬作兵仗亟召

五院部蕭達喇乘便奮擊重元遁去加尚父進封

宋王上親製文褒之詔繪灤河戰圖以旌其功耶

律伊遜陰險不法仁先抑之為所忌出為南京留守恤孤憐禁姦惡議者以為自休格後仁先一人

而已

梵語達喇救渡也原作塔刺伊遜國語解見黑龍江山川卷原乙辛今俱譚改

耶律義先仁先弟美丰姿舉止嚴重重熙十三年西征以功進南院宣徽使時蕭格同知樞密院席寵擅權義先因侍讌言于上曰格狡佞喜亂必誤國家上不納他日侍宴上命羣臣博負者罰以巨觥義先當與格對懽然曰臣縱不能進賢退不肖

安能與國賊博哉終不與博十六年為殿前都點
檢討富珠哩擒其渠帥手詔褒獎以功改南京統
軍使封武昌郡王奏請統軍司錢營息以贍貧民
民得休息軍器完整進富春王卒義先常戒族人
曰國中三父房皆帝之昆弟不孝不義尤不可為
其接下無貴賤賢否皆與均禮妻晉國長公主之
女每遇中表親非禮服不見內外多化之

蕭裕原
作蕭革

富珠哩原作蒲
奴里今俱譯改

耶律罕巴字嘲隱個儻有大志太平中游京師囊衣匹馬而已帝微服出獵見之與語知有長才陰識之會南京疑獄久不決召罕巴馳驛審錄舉朝皆驚罕巴量情處理人無冤者上嘉之重熙六年為北院大王政務寬仁知無不言卒之日篋無舊

蓄枕無新衣遣使弔祭給葬具

蒙古語罕巴已足也原作韓八今譯

改

耶律玠字烏展重熙初皇弟泰國王為遼興軍節

度使以玦同知使事多所匡正咸雍初秦國王為
西京留守請玦為佐歲中獄空者三召為孟父房
詳察帝知其貧賜宮戶十嘗謂宰相曰契丹忠正
無如玦者漢人則劉伸而已

國語為展地頭也原作吾展詳察見名宦

卷原作敬穩
今俱譯改

耶律布勒圖字燕隱開泰間為本班郎君有捕盜
功累遷知興中府以獄空聞太平十九年夏人侵
金肅軍敗之斬首萬餘級加右武衛上將軍時近

邊羣牧數被寇掠遷倒塌嶺都監以治之桴鼓不

鳴清寧初歷長寧歸義二軍節度使致仕

蒙古語布勒圖

金也原作僕里篤今譯改

耶律浩善字托紐初為西南巡邊官以廉潔稱累

遷南京統軍使重熙十一年党項部人多叛入西

夏浩善受詔巡西邊多建城堡徙東京留守與知

府蕭烏魯斯討博羅滿達部有功加兼侍中致仕

國語浩善紙也原作侯哂托紐圖棋也原作禿寧蒙古語烏魯斯國也原作歐里斯博羅解見本

天府山川卷滿遠境城也
原作蒲盧毛 衆今俱譯改

耶律都沁字達年性疎簡不顧小節重熙間歷東
路統軍使城西邊命造戰艦稱旨及西征詔都沁
率兵由別道進會于河濱大捷歸上親賜卮酒手
書都沁衣裾曰勤國忠君舉世無雙

蒙古語都沁
數四卜也原

作鐸軫
今譯改

耶律蘇色字阿敏性忠直簡毅練武事以節度使
歷霸濟祥順聖五州都總管保寧三年改九部都

詳袞四年伐党項屢立戰功手詔勞之統和初安
集西蕃凡臨戎與士卒同甘苦所獲均賜將校賞
順討逆威信大振在邊二十年卒

國語蘇色潦草
也原作速撮今

改譯

耶律納延字伊實年敦厚才敏以父死王事九歲
即加諸衛小將軍大安九年為倒塌嶺節度使壽
隆初討達勒達博索摩等有功賜詔褒美改烏爾
古德呼勒部統軍使邊境以寧秩滿部民乞留詔

許再任納延為人廉介長子理民每有鬪訟親覈

曲直不尚威嚴常曰凡治人本欲分別是非何事

迫脇以立名故所至以惠化稱

納延解見黑龍江城池卷原作那也

伊甯見前唐古特語年妙也原作移斯輦達勒達博索摩解見建置沿革山川名宦卷原作達理得

拔思母按遼史耶律納延傳誤作達里拔思今俱譯改

蕭韓嘉努字括寧性孝友太平中累遷至奚六部

大王治有聲清寧中封蘭陵郡王九年道宗獵太

子山韓嘉努聞重元亂馳詣行在上倉卒欲避于

北南大王院韓嘉努與耶律仁先執轡固諫乃止
重元復誘奚獵夫來戰韓嘉努諭降之重元復敗
太康初伊遜構陷太子濬幽于上京韓嘉努力言

其寃不報

韓嘉努原作韓家奴今譯改

姚景行興中縣人性敦厚廉直人望歸之累官翰
林學士道宗即位多被顧問為北府宰相後告歸
道聞重元亂收集行旅三百餘騎勤王比至賊已
平上嘉其忠咸雍元年出為武定軍節度使減徭

役疏寃滯廣儲蓄以備荒勤校閱以脩武郡民宜之卒封柳城郡王諡文憲

竇景庸中京人聰敏好學清寧中第進士大安初監修國史知樞密院事封陳國公旋授武定軍節度使招流亡戢姦猾決寃獄輕重大小務愜人心七年拜中京留守九年卒諡肅憲

耶律薩喇字董隱性忠直沈厚咸雍九年為契丹行營都部署太康二年欲復召耶律伊遜薩喇獨

奏曰蕭巖壽言伊遜有罪不可為樞臣故出之今復召恐天下生疑進諫者三不納後遂為伊遜誣陷而死乾統初追封漆水郡王與蕭巖壽等並繪

像宜福殿

薩喇解見吉林山川
卷原作撒刺今譯改

耶律唐古字富僧額太康中累遷至大將軍性坦率好別白黑人有不善必盡言無隱時號強唐古在朝數論宰相得失由是屢見廢黜天慶初烏爾古德呼勒叛召拜烏爾古節度使至部諭降之遂

出私財及發富民積以振困乏民大悅加鎮國上將軍保大元年致仕天祚出奔唐古謁于倒塌嶺為上流涕復拜烏爾古部節度使擊破德呼勒之

衆加太子太傅年七十二卒

唐古八旗姓原作崇古國語富僧額藥長

也原作蒲達
宛今俱譯改

耶律托卜嘉字薩巴仕至林牙重熙間破夏人於金肅軍有功清寧中累選永興宮使平重元之亂為懷德軍節度使太康初授北院宣徽使耶律伊

遜謀害太子托卜嘉欲殺伊遜及其黨伊遜知之
誣以與廢立事殺之乾統間追封漆水郡王繪像

宜福殿

國語托卜嘉膝蓋骨也原作撻不
也薩巴見前原作撒班今俱譯改

耶律實魯字楚旺性剛直有經世志始為牌印郎

君太康初為伊勒希巴惡耶律伊遜所為伊遜覺

之誣以附太子流鎮州天祚即位召為御史上書

請盡誅逆黨上慰順考之靈下釋天下之憤不報

聞者莫不歎惋乾統中遙授靜江軍節度使卒

蒙古

語實魯珊瑚也原作石柳楚旺唐古特
語楚水旺權也原作酬宛今俱譯改

張琳潘州人幼有志節壽隆末為秘書中允天祚
即位歷遷至南府宰相及中京陷天祚幸雲中留
琳與李處溫佐魏王耶律淳守南京處溫父子欲
立淳為帝琳沮之曰王雖帝曹初無上命攝政則
可即真則不可處溫不從卒立淳琳不與政鬱悒
而卒

馬人望字儼叔遼東醫巫閭山人穎悟幼孤以才

學稱由進士為松山縣令時歲運澤州官炭獨役
松山人望請于中京留守蕭托歡均役他邑嗣調
涿州新城縣吏民畏愛擢中京度支司鹽鐵判官
轉南京三司度支判官公私兼裕遷警巡使京城
獄訟填委人望剖決無一寃者會檢括戶口未兩
旬而畢同知留守蕭保先問故人望曰民產若括
之無遺他日必滋厚斂之弊大率十得六七足矣
保先謝曰公慮遠吾不及也拜叅知政事南院樞

密使人不敢干以私用人必公議所當與者如曹
勇義虞仲文人望推薦皆為名臣時民所甚患如
驛遞馬牛旗鼓鄉正廳隸倉司之役至破產不能
給人望使人出錢官自募役時以為便致仕卒諡
文獻人望有操守喜怒不形未嘗附聲求榮

北歡
解見

名宦卷原作
吐渾今譯改

耶律都勒幹字伊實音廉約重義咸雍中累遷同
知南京留守被召部民懇留賜詔褒獎大安中歷

南府宰相致仕都勒幹所至有聲吏民畏愛及退
居鄉里子布爾古為烏爾古部節度使遣人來迎
既至見委積甚富曰辭親入仕當以裕國安民為

計枉道欺君以苟貨利非吾志也竟命駕而歸

唐

特語都勒幹戒律也原作鐸魯幹伊寶音解見前
原作乙辛隱索倫語布爾古肥也原作普古今俱

改

欽定盛京通志卷五十九

欽定四庫全書

史部

欽定盛京通志卷六十一

少詹事_臣曹城覆勘

總校官編修_臣朱鈴

欽定四庫全書

欽定盛京通志卷六十

歷朝人物三

金

欽定四庫全書

欽定盛京通志卷六十

歷朝人物 三

金

果布昭祖族人昭祖耀武於青嶺白山還至古哩
甸昭祖得疾寢於村舍洞無門扉乃以車輪當門
為蔽果布卧輪下為捍禦已而賊至刃交加於輪
輻間果布洞腹見膏恐昭祖知之乃燃薪取膏以

為炙昭祖既覺遂中夜啟行

國語米布寬免也原作糶保古哩解見黑

龍江山川卷原作姑里今俱譯改

葉赫系出景祖居舍音水完顏部為其郡貝勒率

所部來歸金之為國自此益大與罕都常在世祖

左右居則與謀議出則蒞行陣明昌中贈特進謚

忠濟與罕都配享世祖廟庭

葉赫國語解見吉林山川卷原作治訶舍

音即珊延解見吉林山川卷原作神隱國語貝勒管理衆人之稱原作勃堇罕都稻也原作歡都今

俱譯改

阿里干景祖第八子健捷善戰太祖舉兵伐遼首
贊大功在行間屢有戰績收國元年太祖即位阿
里干以耕具九為獻曰願陛下無忘稼穡艱難上
敬受之為人聰敏辯給凡一聞見終身不忘始未
有文字祖宗族屬時事並能默記與色格同修本
朝譜牒見素未相識人問其祖父名即能道其部
族世次人或遺忘輒一一辨析言之上稱其強記
人不可及天輔三年寢疾宗翰日往問之盡得祖

宗舊俗法度太宗幸其家視疾詢以國事對曰馬
者甲兵之用今天地未寧而國俗多以良馬殉葬
請禁止從之奏訖卒上哭之慟曰臨終不亂念及
國家事真賢臣也熙宗時追封隋國王大定間配
享太祖廟庭謚剛憲

阿里干原作阿离合懣國語
色格貂鼠也原作斜葛今俱

改譯

希卜蘇昭祖之孫烏肯徹次子健捷能左右射太
祖伐遼珠赫店之役惟希卜蘇之策與太祖合卒

破十萬之師收國元年為愛滿貝勒太祖每伐遼

輒命希卜蘇與太宗居守倚任與薩拉噶比大定

三年封金源郡王配享太祖廟庭謚忠毅

希卜蘇國語解

見奉天山川卷原作習不失亦作解見選舉卷原作肯微柔弱也原作烏骨出珠赫解見選舉卷原作

出河國語愛滿部落也貝勒解見前注原作阿買勃極烈蒙古語薩拉噶樹枝也原作撒改今俱譯

改

完顏杲一名舍音世祖第五子太祖母弟收國元

年為溫貝勒天輔元年以兵一萬攻泰州下金山

縣諸部人皆來降五年為烏赫哩貝勒都統內外
諸軍取中京實北京也六年遠耶律聶哱自立於
燕京移書請和果復書責之遣使請太祖臨軍定
燕京還次鴛鴦灤果從還京師太宗即位果為按
班貝勒治國政天會三年伐宋果領都元帥居京

師卒封遠越國王配享太祖廟庭謚智烈

舍音解
見前注

原作斜也亦作斜野溫貝勒國語溫化也貝勒解見前
注原作吳勃極烈烏赫哩總也原作忽都聶哱單

弱也原作捏里按班大
也原作諳班今俱譯改

棟摩世祖第十一子高永昌據東京棟摩破之於
首山太祖攻遼上京棟摩先登克其外城遂降之
都統完顏杲兵至中京棟摩自城西沿土河以進
遂克其城宗翰等攻西京為四輪革車高出於堞
棟摩與麾下乘車先登遂取西京又克南京殺偽
都統張敦固伐宋為都統節制諸軍克汴京下河
間屢有摧敗天會六年卒年四十熙宗時追封吳
國王配享太祖廟庭謚莊襄

棟摩語解見名宦傳
原作闇黎今譯改

薩拉噶景祖長孫世祖之姪敦厚多智長於用人
家居純儉好穡稼穆宗初襲位命薩拉噶為國相
太祖即位行國相如故自薩拉噶為相能馭服諸
部訟獄皆得其情伐遼之計決於都古噶訥贊成
大業實自薩拉噶始之天會十五年追封燕國王

大定三年贈金源郡王配享太祖廟庭謚忠毅

薩拉

噶訥見前注原作撒改蒙古語都古
噶訥盈滿也原作迪吉迺今俱譯改

幹魯薩拉噶弟收國二年詔統諸軍伐高永昌大

破之永昌遁其下遂執以獻於是遼之南路係籍
女直及東京州縣盡降遼主在陰山青冢之間幹
魯為西南路都統往襲之奏捷曰賴陛下威靈屢
敗敵兵遼主無歸勢必來降皇統五年追封鄭國
王天德二年配享太祖廟庭

普嘉努又名昱景祖孫鄭國公赫紳子太祖自草
樂追遼帝普嘉努為前鋒晝夜兼行追及於實納
圖遼帝遁去兵遂潰所殺甚衆烏庫部反討平之

天會間為司空封豫國公天德初配享太祖廟庭

普嘉努原作滿家奴國語赫紳綱也原作劼孫實納國蒙古語實納土也國有也原作石輦鐸烏庫

八旗姓原作烏虎今俱譯改

宗雄康宗長子始生風骨非常世宗以國器目之
九歲能射逸免年十一射中奔鹿材武蹻捷挽強
射遠可二百步既長孝敬謙謹人愛敬之嘗逐免
達賚亦從後射之已發矢大呼曰矢及矣宗雄反
顧手接其矢就射免中之從太祖伐遼遼帝以七

十萬衆至宗雄獨言不畏率衆直前大敗之於呼
岱巴岡既取泰州宗雄包其土來奏曰其土如此
可種植也由是徙萬餘家屯田泰州從大軍克西
京遇疾卒太祖慟曰此子謀畧過人臨陣勇決少
見其比賜賻葬甚厚大定二年追封楚王謚威敏

配享太祖廟庭

蒙古語達賚海也原作撻懶呼岱
巴國語呼岱市也巴地方也原作

護步答今
俱譯改

錫圖美扎蘭路完顏部人世為其部長系出於始

祖弟後勇敢善戰質直孝友強記辯捷臨事果斷
招諭諸部使附於世祖世祖嘉之後以太祖擊高
麗及伐遼功尤多正隆二年封金源郡王

蒙古語
錫圖美

項戴也原作石圖們國語扎蘭
世代也原作耶懶今俱譯改

烏色世祖子年幼即能集事康宗二年威泰治蘇
伯水部烏色幹魯佐之定諸部而還久之高麗殺
行人阿古雙寬而築九城於海蘭烏色將內外兵
守之高麗兵數萬來拒烏色分兵為十隊更出迭

入遂大破之烏色母病召還以幹魯代之未幾烏色復至再破高麗軍進圍其城高麗請和歸前後亡命及所侵故地退九城之戍遂與之和皇統五

年追封衛國王

國語烏色子粒也原作幹賽蒙古語威泰有記性之謂原作幹帶國

語蘇伯筋也原作蘇濱阿古雙寬國語阿古兄長也雙寬海東青也原作阿晒勝昆海蘭解見建置沿革卷原作蜀

懶今俱譯改

完顏忠本名都古嚕訥錫圖美弟太祖器重之後將舉兵伐遼就謀之都古嚕訥曰以王公英武士

衆樂為用遼帝荒於畋獵政令無常易取也後代
其兄為扎蘭路達貝勒熙宗即位累加同中書門
下平章事天德二年配享太祖廟庭大定二年追

封金源郡王

都古嚕訥解見前注原作迪古乃扎
蘭路達貝勒扎蘭見前達國語為首

之稱貝勒見前原作耶
懶路都勃厘今俱譯改

宗翰本名尼瑪哈薩拉噶長子年十七軍中服其
勇及議伐遼與太祖意合太祖敗遼師于境上薩
拉噶使宗翰來賀捷宗翰與阿里干等勸進太祖

意乃決用其策取中京宗翰聞遼主在山西猶事
畋獵即以精兵六千襲遼主遼主遁去撫定西路
州縣部族遂從取燕京太祖以宗翰為都統太宗
即位宋人來請割諸郡太宗欲許之宗翰持勿割
請伐宋以宗翰為左副元帥降定諸縣克太原執
宋經畧使張孝純等自太原趨汴與宗望會兵克
汴州以宋二主北還賜鐵券定議立熙宗熙宗即
位拜太保尚書令領三省事封晉國王大定間改

贈秦王謚桓忠配享太祖廟庭

尼瑪哈解見選舉
卷原作粘沒喝今

改譯

宗幹本名幹布太祖庶長子太宗即位為固倫左
貝勒輔政始議禮制度正官名定服色興庠序設
選舉治歷明時皆宗幹啓之熙宗即位拜太傅進
太師封梁宋國王賜策杖上殿入朝不拜監修國
史又賜輦輿上殿制詔不名疾亟上及后同往視
后親與饋食既薨輟朝七日大臣死輟朝自宗幹

始世宗時追謚忠烈明昌四年配享太祖廟庭

唐古

特語幹布歲也原作幹本固倫左貝勒國語固倫國也貝勒見前原作國倫左勃極烈今俱譯改

宗望本名幹喇布太祖第二子太祖自將襲遼宗望為前鋒燕京平為副都統襲遼主俘其族屬遼主率兵決戰又擊敗之獲其子趙王及傳國璽討張覺覺遁平南京奏請伐宋自燕山路進破郭藥師兵於白河降之取燕山府州縣悉平天會四年八月取天威軍克真定遂趨汴分遣諸將破宋援

兵克汴州宋少帝詣軍前降師還卒追封魏王天

德二年加遼燕國王配享太宗廟庭大定三年改

封宋王謚桓肅

國語幹咄布令其撈之也原作幹魯補亦作幹萬不今譯改

宗弼本名烏楚又名烏珠太祖第四子從宗望伐

宋以三千騎薄汴州宋上皇出奔敗鄭宗孟兵數

萬遂克青州取臨朐詔再伐宋攻破濮州大名河

北平宋主自揚州奔江南宗弼進兵自和州渡江

降江寧取廣德軍路追襲宋主于越州宋主入海

遂克明州秀州平江鎮江自鎮江汧流西上宋韓
世忠襲之將至黃天蕩宗弼因老鸛河故道開三
十里通秦淮一日夜而成乃至江寧將渡江而北
又與伊喇古戰世忠軍以火箭射之殲其舟軍北
還定陝西為右副元帥封瀋陽入朝進拜都元帥
誅達賚再平河南克廬州渡淮與宋畫淮水為界
皇統三年為太師大定中謚忠烈配享太宗廟庭
世宗嘗曰宗翰之後惟宗弼一人而已

烏楚原作
幹啜烏珠

原作兀末即幹咄之誤解見吉林山川表
伊喇古八旗姓原作移刺古今俱譚改

薩里干亦名景安帝六代孫雄偉有才畧從平陝
西所降城堡最多睿宗留兵屯衝要使薩里干總
之請收劍外十三州連破吳玠軍盡下諸砦天會
十四年為元帥右監軍宋兵九萬會于涇州薩里
干以輕騎敗之取涇州尋為右副元帥皇統三年
封應國公海陵時以久握兵權忌之以為行臺左
丞相兼左副元帥陽尊以殊禮使托卜嘉圖之令

史約索希旨誣以謀反子宗安被掠不服而死殺

薩里干于汴大定三年追封金源郡王謚莊襄配

享太宗廟庭

薩里干原作撒高喝托卜嘉解見人物卷二原作撻不野國語約索儀也

原作遙設
今俱譌改

尼楚赫宗室子與錫固納使遼還具以遼政事人

情告首贊太祖伐遼遼將耶律鄂爾多率兵二十

萬戰於達嚕噶城尼楚赫與羅索率衆擣其中堅

九陷陣大敗遼軍從都統杲克中京遼主西奔尼

楚赫以兵絕其後遂見獲後又屢敗宋師克太原
取汴城天會十年為燕京留守遷中書令封蜀王

卒贈金源郡王配享太宗廟庭謚武襄

國語尼楚赫珍珠也

原作銀末可蒙古語錫固納審問也原作習古迺
鄂爾多國語解見奉天府山川卷原作訛里朵達
嚕嚕頭目也原作達魯古羅索解
見選舉卷原作婁室今俱譯改

瑣都一名昂景祖弟伯赫之孫也年十七從太祖

平燕有功天會二年南京叛軍帥棟摩遣瑣都討

平之天眷元年宋兵十萬攻東平瑣都多張旗幟

於林間自將精兵于陣前敵疑有伏不敢動相持
數日而退瑣都襲之至清口宋兵汎舟逆水而去
時霖雨不止瑣都附水屯營夜將半忽促衆北行
下令曰鼓聲絕而敢後者斬遂拔營去二十里是
夜宋人劫營無所得諸將問故瑣都曰沿流下者
走也汧流上者誘我必追也今大雨泥淖彼舟行
安我陸行勞士卒飢乏弓矢敗弱又居下流襲我
必矣衆皆稱善在東平七年遷東北路招討使改

崇義軍節度使天德初授上京路世襲明安封藩
國公大定中進封漢國公卒年六十四上輟朝悼
惜賜賻甚厚殯都在海陵時縱飲沉酣及世宗即

位頗自愛性行敦睦尤善施予貧困者必厚給之

君子以為達

蒙古語殯都圈也原作奔睹國語
伯赫墨也原作字黑今俱譯改

阿里布葉赫子多智畧勇於戰未冠從軍平河南
功為最皇統時授歸德軍節度使累遷儀同三司

世襲明安歷官有惠愛得民心及卒人皆惜之

國語

阿里布呈遞也原
作阿魯補今譯改

宗賢本名阿魯太祖伐遼從攻寧江州臨潢府有
功太宗監國甚見親信遷歸德軍節度使政尚寬
簡境內大治秩滿士民詣闕請留及改武定軍百
姓扶老携幼泣送數十里改永定軍士民持盆水
與鏡前拜言曰使君廉明清直類此天德初授世
襲穆昆馳驛召之雄州父老相率張青繩懸明鏡
于公署老幼闐門三日乃得去封定國公進廣平

郡王改崇義軍節度使大定初宗賢率諸宗室見

世宗於遼陽封景國公為博索路兵馬都總管致

仕

阿魯解見山川卷原作阿魯穆昆解見名宦卷原作謀克博索解見名宦卷原作婆速今譚改

托克速宗室子嘗領偏師破雲中諸山寇盜又討

平應州賊撫安其民而還及隨宗翰伐宋戰于文

水破宋兵三十萬貝勒烏爾古攻石州屢敗托克

速謂烏爾古曰敵皆步兵吾不可以騎戰烏爾古

曰聞賊挾妖術畫馬以繫其足疾甚奔馬步戰豈

可及之托克速笑曰豈有是耶乃令諸軍去馬戰

敵遂大敗天眷三年為元帥左監軍卒正隆二年

贈應國公

國語托克速鄉村也原作笑合速貝勒見前烏爾古見人物二卷原作字並烏

谷今俱
譯改

實實錫圖美子太祖攻寧江州實實推鋒力戰從

克中京敗夏將李良輔兵與羅索獲遼帝于伊都

谷宗翰伐宋以懷孟控制險要使實實統十二明

安軍鎮撫之殄平寇盜招集流亡四境以安卒贈

特進謚威敏

國語實實榛子也原作習失伊都
都班次也原作余睹今俱譯改

思敬實實弟純直有才幹從其兄攻太原復從完
顏和尼下洛陽圍汴皆有功大定九年拜樞密使
上疏論五事其一女直人可依漢人以文理選試
其二契丹人可分隸女直明安其三鹽滌官可罷
去其四與明安同勾當副千戶官亦可罷其五親
王府官屬以文資官擬注敎以女直語言文字世
宗納之時欲修熙宗實錄上謂思敬曰卿嘗為侍

從必能記其事蹟對曰熙宗時內外皆得人風雨
時年穀豐盜賊息百姓安此其大概也何必餘事
上大悅蓋世宗喜立事故其微諫如此卒時世宗

親臨喪哭曰舊臣亡矣

蒙古語和尼羊也
原作活女今譯改

宗尹阿里干子世襲穆昆性行醇厚大定中拜平
章政事封代國公兼太子太傅時民間錢幣不通
世宗以問宗尹對曰錢者有限之物積於上者滯
於下所以不通昔海陵軍興為一切之賦有菜園

房稅養馬等錢百姓苦之今天下無事府庫充積
悉宜罷去世宗納之於是養馬等錢始罷北方雖
飢軍食不足議者謂秋成近不必更勞輓輸宗尹
曰國家平時積粟所以備凶歲也必待秋成則憊
者衆矣如防戍何世宗從之

宗寧系出景祖性勤厚有志操大定二年為會寧
府路押軍萬戶擢歸德軍節度使時方旱蝗宗寧
督民捕治得死蝗一斗給粟如之數日蝗絕移鎮

臨潢累遷兵部尚書授隆州和屯明安徙鎮利涉
軍入拜平章政事宗寧居家儉約如寒素臨事明
敏其鎮臨潢隣國有警宗寧聞知乏糧即出倉粟
令以牛易之敵知得粟即遁去時邊人苦無牛宗
寧復令民以粟易牛而倉粟倍于舊其經畫如此

明昌二年卒

國語和屯城也原作和國今譯改

宗憲本名鄂拉薩拉噶子年十六選入學兼通契
丹漢字未冠從兄宗翰伐宋汴京破人爭趨府庫

取財物宗憲獨載圖書以歸時朝廷議制度禮樂
往往因仍遠舊宗憲以為當遠引前古因時制宜
成一代之法何乃近取遠人制度哉希尹由是器
重之累官尚書左丞攝門下侍郎皇統五年將肆
赦議覃恩止及女直人宗憲奏曰莫非王臣慶幸
可有間耶遂改其文使均被焉天德初為中京留
守進封鉅鹿郡王世宗即位召為太子太傅拜平
章政事時有司言諸路明安穆昆怙其世襲多擾

民請同流官以三十月為考憲乃上議曰昔太祖
撫定天下誓封功臣襲明安穆昆今若改為遷調
非太祖約臣謂但當明核善惡有不職者於弟姪
中更擇賢者代之上從其議進拜右丞相大定六
年卒上輟朝悼痛久之遣官祭奠賜賻甚厚

鄂拉
蒙古

語解見黑龍江山川
卷原作阿懶今譯改

宗叙本名德壽棟摩子奇偉有志畧好談兵累官
寧昌軍節度使世宗時伐遼伐宋歷有戰績嘗奏

陳黃河利害及南邊事宜俱合上意大定二十一年奉詔巡邊半途病甚遺表朝政得失及邊防利害使其子上書卒年四十六上傷悼輟朝曰宗叙勤勞國家他人不能及也賜賻甚厚明昌五年配享世宗廟廷

宗浩字師孟昭祖四世孫世宗朝初命充符寶祇候歷同知陝州防禦使事察廉能第一等累拜叅知政事章宗即位出為北京留守北方有警命宗

浩佩金虎符駐泰州便宜從事北部多乞內屬拜
樞密使封營國公畧進左丞相會伐宋命兼都元
帥往督進討宋遣張巖以書乞和宗浩以詞旨未
順却之巖復遣方信孺齎書至宗浩因之以聞仍
遣之使歸復書於巖宋竟改叔為伯增歲幣備犒
軍銀兩韓侂胄蘇師旦首以獻而乞盟焉宗浩遂
卒于汴計聞上震悼輟朝勅隨行官屬率軍士送
至葬所仍持繪像至都親臨祭奠謚通敏

完顏襄昭祖五世孫幼有志節善騎射多勇畧大
定初從討契丹七戰皆捷賊所駐地多草乘風縱
火襄亦縱火立空地以俟卒大敗之事平論功第
一及伐宋為先鋒問道克清流關師還率躡路節
度使移海蘭路兵馬都總管襄智勇兼備有經世
才屢在外任治有異效既進尚書左丞朝廷褒賞
廉吏猶詔天下列其名以示獎勵世宗不豫以右
丞相受顧命明昌中代瓜爾佳清臣禦北邊降其

部長勒勲九峯石壁捷聞封常山郡王契丹德壽
托色等據信州叛衆號數十萬遠近震駭廷臣議
罷郊祀襄獨曰大禮不可輕廢臣乞於祀前減賊
既而賊破果如所料進封南陽郡王初討契丹自
龍虎衛上將軍以下許承制授之襄以為賞罰之
柄非人臣所宜與不敢奉詔北部再叛拜襄平章
政事屯北京民方艱食乃減價出糶或以兵食方
急為言襄曰烏有民足而兵不足者民大悅服及

用兵勦撫並施北陲遂定拜左丞相襄在政府前
後二十年明練故事簡重能斷待屬吏盡禮用人
各得所長為當世名將相卒謚武昭大安間配享

章宗廟庭

托色解見人物卷二
原作陀鎖今譯改

完顏衷世祖曾孫大定中授代州宣銳軍都指揮
使歲旱州委禱雨于五臺靈潭步至其地雨隨下
人為刻石紀之衷孝弟貞謹深悉本朝婚禮皇族
婚嫁每令衷相之治復有能稱其在寧海蠡州平

賦役無擾民民為立石頌遺愛焉大安初追贈輔國上將軍

完顏琮一名承慶顯宗子也儀觀豐偉機警清辯性寬厚好學世宗選進士之有名行者納塔謀嘉教之及長輕財好施無愠色善吟咏不喜聞人過騎射繪塑之藝皆造精妙章宗時封郕王卒謚莊惠

完顏璫一名和勒端琮之弟性忠厚寡言內行修

飭工詩精騎射書藝章宗即位稱其性忠孝嘗令

在左右封瀛王卒謚文敬

和勃端解見名宦卷原作桓篤今譯改

完顏齊本名蘇赫穆宗曾孫大定中累遷刑部員

外郎世宗諭曰本朝未嘗有內族為六部郎官者

以卿歷職廉能故授之出為磁州刺史治以寬簡

未嘗留獄明昌三年始議置諸王傳頗難其選乃

以齊傳充王王府家奴無敢犯者六年移利涉軍

節度使留守上京齊明法識治體所至有聲內族

中與丞相承暉並稱云

國語蘇赫各也原作掃合今譯改

宗道上京司屬司人系出景祖通周易孟子善騎射章宗時除西北路招討使故事諸部駕馬八百餘疋宗道辭不受諸部悅服邊鄙順治尋除陝西路統軍使以鎮靜得軍民心特遷三階兼知京兆府事時夏旱俾長安令取太白秋水步迎於遠郊及城而雨是歲大稔人以為積誠所感承安中知河中府有惠民立石像于層觀以時祀之泰和

四年卒贈龍虎衛上將軍

欽定盛京通志卷六十